



客(大埔)/景點/☆☆☆☆

## 大雪山，雲个故鄉

戴在東勢，真有福氣，四圍山接山、林(naˋ)連林，大大細細个山，一重連過一重，揆天个大雪山，係所有大山嫲个統領，佢高大莊嚴，企在東勢个東片向。熱天時，佢係天然个冰庫，寬寬送出分人涼爽个冷氣；寒天時，該山頭个白帽，錫著眾人頓腳欣賞，白雪雪个山頭傳達佢亙古个執性。

同天比高个大雪山，對老頭擺到今，守護山下生活个老嫩大細，像阿姆關心子兒樣个心情，目金金掌緊你，山項豐富个資源，也由在偲這兜，採集收獵。規畫做森林遊樂區了後，佢展現更加多元个面相，好跋山个人，鵠婆髻揆鼻个山壁係你胚想毋著个挑戰，跋過一輪，手掣腳顫，歸禮拜毋知手腳仰脣擺正適當。腳筋毋硬个人，坐緊車，跔山路彎彎幹幹，共樣使得跋上兩千零公尺个山頭。

企在兩千六百公尺高个埡口觀景臺項，群山疊嶂近在眼前，該鋪坪个青，活生个青，直直開展到天个心臟去，雲係白色个波浪，在半山排白蓬蓬一大片，翻轉來眨過去，寬闊又壯觀。在這位，你會佬著自家係仙、係神，世間个事離你有十萬八千里恁遠！

在高高个山嶺頂，一窟水自從毋識燥旱，清淨个水竇，大大細細个魚陣，活潑搞寮，天藍山青，翕相个樣影在該安做天池个所在。成半下，一陣濛紗煙跔風捲過來，像鏡樣个水面黏時牽起賁賁个白紗網，虛虛玄玄个景色，分人痴痴呆呆像發夢，金翼白眉鳥毋驚人，嘰嘰啾啾尋人討食，靈山聖地連鳥都恁有靈性。

賞撇天池，順核高高挺挺个華山松林、紅檜，跔緊歸路搖搖擺擺个「毛地黃」腳跡，溜崎落到歲數上千，既經一千四百歲个雪山神木所在，企在樹下，讚嘆厥个高、厥个大，堅韌个生命力，尤其分人感動，同神木對相个同時，你會反想：世間小名、小利，偲人爭得幾時？

作者：劉玉蕉

### ☆詞彙學習☆

【揆天】dudˋ tien+：高聳入雲霄。

【鋪坪】pu+ piangˋ：一大片。

【鵠婆髻】rhauˋ poˋ zuiˋ：鵠嘴山的客語稱呼。

【活生】fadˋ sang+：生意盎然。

【虛虛玄玄】hi+ hi+ hienˋ hienˋ：虛無飄渺。

【對相】duiˋ siongˋ：對看。

### ☆文法學習☆

【溜崎】liuˋ giaˋ：快速的下坡。與「落崎」意思相同，但程度上有些微的差異。一般來說，大埔腔沒有「下」崎、「下」車、走「下」來……的說法，與四縣、海陸腔不同。

【兩千零】liongˋ cien+ langˋ：兩千多。「零」原為零星、不成整數的意思，加在數詞之後，表示略為超過某個數量。相近的用法為「兩千空、兩千外」。

例：佢既經百零歲了！（他已經一百多歲了！）